

楊襄毅公本兵疏議

楊襄毅公本兵疏議卷之十二

遵 諭會官集計邊務疏

少保兼太子太保兵部尚書臣楊博等謹

題為傳奉

聖諭事該兵部題職方清吏司案呈奉本部送本年十一

月初九日酉時該 內閣傳奉

聖諭擇將練兵今須集計及三衛之夷亦要一處導彼狂  
肆皆此物不知博有何見欽此欽遵傳奉到部送司案  
呈到部臣等看得 國之大事莫先於戎臣之抱忠  
各據所見蠢茲醜虜仰仗

皇上玄威震疊雖已遠遁善後之策亟當早圖茲蒙

聖諭將擇將練兵事宜特令臣等集計臣等待罪本兵正  
欲廣集衆思不勝欣慶不勝感激除會集五府九卿  
大臣并六科十三道掌印官另行計處會題外查得  
朶顏三衛夷人本月初四日先該臣等條議十事內  
一款議處朶顏三衛夷種已經奉有

欽依通行欽遵外臣等竊聞堯舜之時分北三苗庶績咸  
熙盖言三苗之中善惡不一其善者即留之其不善  
者則去之以故勸懲既明恩威自著兩階干羽之舞  
光映簡冊凡以處置得宜故爾即今

聖神在上遠過堯舜而三衛夷人近在郊圻之外比之苗民尤爲不同但中間固有背華而勾虜作逆者亦有效順而傳報虜情者若使一槩勦滅殊非天地包函之義況此輩獸心狼子全視我之強弱以爲順逆若使我將果擇我兵果練東西二虜可以鞭撻惟此小夷自當震聳弗遑譬之元氣既壯邪沴必消臣博以爲我

皇上今日擇將練兵之計

聖謀神筭乃其第一義也即今總督都御史劉燾總兵官胡鎮巡撫都御史溫景葵俱當開府蒞任之初正屬

夷情觀望之會合無通行各官仍照臣等原議將三衛都督等官明白宣諭即將勾虜作逆者訪究的確姓名責令本管都督綁縛獻出都督重加陞賞夷犯置諸重典以示懲戒如或都督自行勾虜或將手下作逆之人不行獻出革去官職絕其通貢如果情罪深重仍要據實奏請以憑勦處至於向化之夷又當多方撫字每遇叩闕入貢則豐其廩餼厚其賞賚使之退無後言或遇走報虜情則待之以誠犒之以禮使之樂於効命中間果能將西虜辛愛把都兒東虜土蠻設法擒拿函首來獻者優以萬金之賞庶幾善

者既知所勸惡者自無所容不惟足以服彼夷之心  
亦自可以消彼夷之黨度勢審時似得分北三苗之  
義臣之愚見如此未敢謂其允合機宜伏望

聖旨俯賜裁定勅下遵行惟復會官集議一併具奏定奪  
寺因本月十一日題奉

旨還都會官集計來說欽此欽遵抄捧到部行准府部  
院寺及科道官各將擇將練兵應行事宜具揭前來  
臣等會同後軍都督府掌府事太師兼太子太師成  
國公臣朱希忠等吏部尚書兼翰林院學士臣嚴訥  
等議得頃者醜虜匪茹突至畿輔仰仗

皇上聖神文武誠感玄穹風雨交助大伸撻伐之威兵將咸集實落疆喪之膽初潰劔於孤山後驚怖於古北扶傷救死狼籍而還此誠二百年來未有之事但惟聖王之於夷狄視之真如禽獸來則禦之以為外攘之圖去則備之以脩內治之政要之期於奠安中夏使之不敢侵軼乃上策爾茲蒙

聖諭以擇將練兵責令臣等集計此誠堯舜總章博訪四夷來王之盛心也臣等淺昧敢不仰承萬一大抵邊方大計無過擇將練兵二事二事之中擇將尤為要務蓋將既得人則戰守機宜無不曲中不止於練兵

一節而已但擇將須重其事權牽合而遙制均不能  
展其揮霍之材練兵須明其賞罰有罰而無賞終無  
以作其奮迅之氣用是臣等各摠一得集為一十四  
事至於三衛夷人臣等覆將兵部原議面加參酌一  
併開坐上請伏乞

聖明俯賜采覽勅下遵行臣等又惟因事建白持議於嚴  
廊者臣等之事也隨事宣力奉行于封疆者邊臣之  
事也若使臣等言之邊臣不能行之竟成畫餅曷濟  
饑渴臣等目擊往事又不能不竊懼焉仍望

皇上申飭總督都御史劉燾總兵官胡鎮巡撫都御史溫



景葵當此新任之初將臣等所議并兵部原議十事  
逐一舉行意見相同者星夜回奏意見未同者明白  
執奏臣等與兵部原議所未及者作速條上方略不  
必掇拾浮文止要剴切事體聽兵部以次覆奏定奪  
庶幾實政既脩實效自著而我

皇上宵旰之懷亦可以少舒矣嘉靖四十二年十一月十  
二日題奉

聖旨是尹秉衡劉漢依擬用奏內事宜係薊鎮的便行與  
劉燾等務在着實舉行清查役占尤要先行之司道如  
或因循虛飭兵部及該科不時指名叅劾其查處將領

申明體統二條仍行各邊一體施行薊鎮并宣府添設  
兵備官數多於邊事有損無益吏部查議裁減來說錢  
糧着戶部戎政着總督協理官各計處條奏欽此

一更置大將計議得各鎮總兵即古之大將關係甚  
重方今見任之中如宣府馬芳薊鎮胡鎮天同姜應  
熊延綏趙崙遼東佟登山西董一奎寧夏吳昇甘肅  
呂經固原許經俱稱一時之選而保定祝福則清謹  
有餘機警稍劣昌平何淮則邊事雖熟年齡漸邁相  
應急為更置查得京營副將尹秉衡宣大軍門標下  
管遊擊事原任總兵官劉漢驍健絕倫近因薊鎮之

警一戰一守均為有賴合無將尹秉衡仍以署都督  
僉事充鎮守保定總兵官劉漢量復署都督僉事充  
鎮守昌平總兵官合用 勅書旗牌關防等項照例  
查處仍令刻期任事以為春防之備其祝福何淮聽  
候別用以後舉用總兵無拘於資格母牽以文法略  
其微瑕取其大節庶幾閫外之權得以展布

一查處將領計議得薊昌二鎮自總兵外有副叅有  
遊守有提調領班雖大小不同均有戰守之責除牆  
子嶺叅將戴恩提調劉健俱係新任無容別議合無  
備行總督劉壽總兵胡鎮巡撫溫景葵即將薊昌見

任將領上自副叅遊守下至提調領班通行甄別要  
見某人謀勇堪以留用某人怯懦不堪留用遣下員  
缺就該何人頂補逐一開坐限半月以裏會本回奏  
如果有人皆稱職亦要明白咨部不必過於搜索以失  
器使之義其各該中軍千總等官以後俱聽總兵徑  
自選用係標下者總兵公同該管叅遊係各區者總  
兵會同巡撫務要至公至當巡按巡關兵備俱不許  
干預

一慎嚴薦舉計議得用將當因其才薦賢貴考其實  
近年兵部推用將官止憑總督撫按等官薦剡但各

官中間據實奏薦者固多而一時咨訪未周以致司道府州得以愛憎蔽於其間者蓋亦有之不知一方軍政係於一人之身誤用一人貽害一方所係誠非細故合無聽兵部備行總督撫按等官以後薦舉將才要見某人驍勇曾在某處血戰某人練達曾歷某事有功某人待廉而收士卒之望某人知兵而為節制之師考詞明白直書不得仍擬四六牽合對偶徒充觀美之具文書到日限一月以裏作速回奏果有忠義謀勇文武兼資者另作一等特本會薦如或仍蹈夙弊舉錯顛倒聽兵部并該科指名叅治

一斟酌任用計議得今之將材各有所長固有善於  
攻擊而不識一丁者亦有宣於韜鈴而射不穿扎者  
必須隨材器使方克有濟人無聽兵部以後推舉大  
小將領務要悉心酌量如領兵出戰則用勇將如設  
險守垣則用智將長於吏事則用為都司未歷邊事  
則處之兵備上自指揮千戶下至百戶鎮撫俱許推  
用行伍之中果有超群異材各該總督撫按官聽總  
副叅遊各舉所知如果相同尤當大破常格一體奏  
薦聽兵部以次議處

一廣搜散將計議得各鎮關散將官固多賊私狼籍

怯懦無為之人中間豈無年力尚強誤遭萑莽而見  
逐驍雄有略偶以數奇而失事者即今虜患孔棘若  
使終於棄置不無可惜合無聽兵部通行各邊督撫  
巡按等官文書到日限一月以裏各將境內散將不  
拘克軍為民立功閑住行總兵司道官逐一呈舉總  
督撫按處如果年力精壯謀勇過人查訪相同從實  
疏薦明開某人係某總兵薦某人係某司道薦以後  
不稱所舉或別有請託情弊就將原舉之人併行究  
治兵部隨將舉到官員酌量奏請令其帶領家丁自  
備鞍馬給文起送薊遼軍門分發各營立功自効果

能建有奇功方准贖罪總兵司道不許避嫌遠怨故稱絕無可薦之人致快邊事

一申明體統計議得總兵官原係大將例得便宜行事至于裨將

勅內亦各明開軍士不用命者許以軍法從事邇年以來法紀廢弛人心怠玩以致每遇臨敵全無臂指相承之義合無申明法紀以後總兵偏裨俱要遵照

勅諭振揚軍威但有抗違軍令者即便處以軍法其沿邊兵備與將領相與務要彼此諧和不許凌駕欺肆因而中傷府州縣官見總兵官各執以鎮屬之禮應該



收保等項俱聽總兵調度違者徑自叅究

一操練主兵計議得練兵之法全在練膽膽氣既充  
勇力自倍近歲薊鎮教練漸見有成即如胡鎮孤山  
之力戰郭琬古北之伏擊部下之人半皆土著足為  
明驗除兵部新議標兵各有將領方在整飭外合無  
聽兵部備行總督劉壽督同鎮巡官胡鎮溫景葵將  
各鎮入衛邊兵無事之時酌量屯駐各區每營選撥  
精於技藝邊兵三五百人令其相兼教習本區之人  
每十人中八人習火器二人習步矢務期人人精熟  
以收實效至於家丁一節比之官軍更為得力薊鎮

不拘副叅遊軍提調等官俱許自募家丁報名在官  
一體給與糧餉每官一卒雖至二三百人亦不為多本  
部仍行河南山東都御史將民兵工食每名各增銀  
三兩就遼原額之數總解薊遼軍門公同巡撫官查  
議每年總副叅遊軍丁官下各給若干以為操練犒賞  
之用昔賢守邊推牛享士不問費之出入意誠有見  
於此

一練習鄉兵計議遼東鄉村壯夫近日如馬房等處則  
斬獲首首三河平谷等處則爭報首功乃知慷慨悲  
歌自是燕趙之俗石使各處鄉兵練習有成家自為

守人自為戰比之市兵勞費迥不相同合無聽兵部  
備行薊鎮總督鎮巡兵備等官專委能幹有司官員  
將鄉村壯夫設立隊長隊副無事聽其各自生理有  
警責其保守本村果能斬有虜首一顆願陞者照例  
陞級不願陞者賞銀五十兩奪獲馬匹夷器盡數給  
賞果能擒斬酋首照依近日題准事例超格陞賞合  
用器械即將歲徵軍三民七免行解部就彼打造應  
用但不許有司點查比較反成騷動

一清查役占計議得薊昌三鎮主兵連年補練召募  
雖未盡足原額亦有十萬之外但各該衙門役占太

多以故食糧則有名出戰則無實若不備加清查千  
瘡百孔為害不淺合無聽兵部備行總督劉燾督同  
鎮巡將領兵備官員將各區主兵見在人數逐一清  
查實在若干某人等騎兵某人等步兵某人等哨守  
某人等雜差果有役占作速還伍如敢堅悞不發聽  
巡按巡關御史指名叅奏

一充裕糧餉計議得兵馬錢糧當作一家計算即今  
薊昌二鎮新增標兵并防春之兵合用錢糧馬匹通  
當早處除馬匹兵部先已題奉

明旨另行整備外合無聽戶部速行總督劉燾巡撫溫景

葵即查新添標兵四枝軍馬該用糧料草束各若干  
明年防春錢糧見在若干是否足用不敷若干應該  
作何添給旬日以裏明白回奏應該足餉理財一應  
事宜聽戶部酌量議處另行奏請

一預備火器計議得 中國長技莫先於火器近日  
胡鎮王孟夏等猝遇大虜往來轉戰全得其力守牆  
衝鋒均當多備中間如快鎗毒火飛砲鳥嘴銳等項  
尤為便利令無聽工部備行總督劉壽晉同鎮巡官  
胡鎮溫景葵選委能幹官四五員分投前去各區各  
營將見在火器分別守牆出戰二項要見堪用若干

缺少若干

以具總數作速回報工部如數給發其合

用鑒

要先期請討聽工部徑自處給

一

外口計議得薊昌二鎮因山為牆延長二千

餘里節年脩繕雖稱苟完然一牆之外即為屬夷營  
帳殊非重關壘嶂先則制人之義今無聽兵部備行  
總督劉燾督同鎮巡官胡鎮溫景葵選委熟知地里  
廢閑軍職十數員各另分管一區會同本區副叅遊  
守提調等官親詣口外逐一踏勘或因山設墩以明  
耳目或因水設柵以阻虜騎或占據山梁為我戰地  
或伏毒泉流絕彼汲道或廣植樹木或挑鑿要害凡

可增置重險處所各令畫一水界小圖陸續封選兵部稽考若果建置有方一可以遏狂虜之衝突一可以絕屬夷之窺伺

一議處邊吏計議得順永二府府州縣掌印佐貳首領官切隣關塞平居有選練鄉兵之責有整辦錢糧之責有脩理堡寨之責臨警有守保之責有城守之責有零戰之責必須性資警敏氣魄揮弘之人方克濟事即如知州張守中近日防守通州卓有成效足可駁已合無聽吏部速行總督撫按官即將二府有司通行甄別要見某人堪當邊任相應久任責成候

其積有年勞或增俸或加秩明白開列某人不堪邊任相應改調別處文書到日限二十日以裏作速回奏遺下員缺吏部照依三途並用事例不拘科貢吏員出身惟取其材識不拘其資格以次銓補

一查議京營計議得京營官兵昨者之警用之列營僅有可觀用之赴關全不足恃若不亟為整飭百萬糧餉空爾糜費殊為可惜合無聽兵部備行戎政大臣顧寰喻時即將原堪出戰之兵再行揀選且無言多但得精兵一二萬人緩急亦自有濟府議欲分正兵備兵科議欲將兵分三等老弱者為下等照舊存



恤少壯者為中等衣糧稍豐勇敢出衆者為上等衣糧加豐亦要一併計處明白開坐具奏

一議處三衛計議得朶顏三衛先該兵部議奏具揭前來臣等面加酌議中間種類繁多善惡參差委難一槩誅夷稽古堯舜之分北三苗仰觀我

皇上之處置三衛神聖本同一揆廣運自難二道合無仍照兵部原議擇將練兵修我內治彈壓其心一面備行總督鎮巡等官將三衛都督等官明白宣諭各將勾虜作逆者訪究的確姓名責令本管都督鄉紳獻出都督重加陞賞夷犯置諸重典以示懲戒如或都

督自行勾虜或將部下作逆之人不行獻出革其官  
職絕其通貢如果情罪深重仍要據實奏請以懲勸  
處至於向化之夷又當多方撫字每遇叩闕入貢則  
豐其廩餼厚其賞賚使之退無後言或遇走報虜情  
則待之以誠犒之以禮使之樂於效命果能將東西  
酋首辛愛等函首來獻不吝萬金之賞總督鎮巡官  
務要安詳嚴重既不宜傷於刻削有失衆心亦不宜  
過於姑息滋其狂肆但干係夷情事體重大伏乞

聖裁

覆宣大總督尚書江東叙宣大入援戰功陞賞疏

題為仰仗

天威官兵奮勇敢戰斬獲首級奪獲戰馬人畜夷器等事  
職方清吏司案呈奉本部送兵科抄出總督宣大山  
西等處地方兼薊保軍務兼理糧餉太子少保兵部  
尚書兼都察院左副都御史江東題奉

聖旨兵部看擬來說欽此欽遵抄出送司案呈到部看得  
總督宣大山西等處地方兼薊保軍務太子少保兵  
部尚書江東題稱虜賊擁衆突入薊鎮順義等處宣  
大各營應援官軍與賊拒堵邀擊斬獲首級奪獲馬  
匹夷器等件緣由及稱鎮守大同總兵官姜應熊功

居一等副總兵麻祿遊擊麻錦功居二等北路叅將  
劉國中路叅將李印東路叅將方振山西叅將吳嵩  
大同遊擊王國勳宣府遊擊劉定牛相保定總兵官  
祝福功居三等原任總兵今充軍歐陽安叅將羅恭  
高延齡王臣周應岐白琮葉經文旗牌官李鳳牛栢  
聶繼先楊蘭劉勝狄英張海吉仲庫張仕藝唐增常  
銳王希增徐傑李英方鎮功居四等宣府總兵官馬  
芳標下原任總兵劉漢原任總兵聽勘張承勛勞宜  
並論京營副將尹秉衡叅將戴恩保定巡撫都御史  
李遷兵備副使劉應節嚴清亦宜併敘其各營管領

前鋒原任叅將劉卿等一十一員中軍率爵等五員  
勞不可泯并獲功願陞楊天伏等二十名願贖谷本  
源高尚恩均乞查議各一節除尹秉衡戴恩已經賞  
賚外為照薊鎮之警虜初以為時已十月兵必解嚴  
意在乘我不備以逞跳梁之計方至孤山總兵官胡  
鎮既奮不顧身督率諸將與之血戰回至密雲石匣  
總督江東新承簡命又親統官兵與之邀擊一時  
群醜斃於鋒敵之下者曷啻千計此皆我

皇上明德格天而萬靈助順武功動地而諸將爭先火礮  
齊發不啻迅雷之震警風雨交加真賴玄穹之鑒佑

簡書日至赫然礪斧揮戈之文犒賞宵臨大增統續  
投醪之氣快犬羊之落魄生者帶傷死者枕藉誠二  
百年未有之功喜士馬之歡騰揮刀直前裝鎗力戰  
舒萬億人不平之憤

神功偉略臣等淺昧何所揄揚伏望

皇上擇日謝玄以荅洪眷以慰群情臣等無任惓惓懇祈  
之至至於一時諸臣不敢貪天功以為已力事干激  
勸亦當甄叙即如總督尚書江東心誠報國意切  
攘胡人駐懷來已憂畿甸偶聞警報隨至郊關即順  
義河防之嚴先聲已振乃牛欄誅斬之烈虜勢遂摧

躬環甲冑且行且戰於密雲口授韜鈴有獲有俘於  
石匣功本奇特首應優論其總兵官姜應熊等雖主  
將裨將不同均效矢石之勞共成敵愾之績既該江  
東覈勘明實具題前來相應通行議擬合候

命下將江東特加陞陟 賜勅獎勵姜應熊厚加陞賞馮  
芳劉漢麻祿麻錦張承勛同加陞賞劉國李印方振  
吳嵩王國勳劉定牛相祝福厚加賞賚歐陽安等二  
十二員并李遷劉應節嚴清量加賞賚李爵等五員  
軍門分別犒賞劉卿等一十一員照依斬獲事例與  
同獲功官軍人等一體另行陞賞谷本源高尚忠桂

與贖罪章靖四十二年十一月十二日題奉

聖旨朕仰荷上天垂祐虜賊退遁入援官軍宜加恩勞江東加太子太保廕一子入監讀書姜應熊於祖職上陞二級馬芳一級各賞銀三十兩紵絲二表裡劉漢等各一級與劉國等各賞銀二十兩一表裡歐陽安等各十兩張承勛部下斬獲數多遇缺酌量推補其餘依擬欽此

請命薊鎮總兵官節制客兵疏

題為亟重薊鎮總兵事權以定安攘大計事職方清吏司案呈照得薊鎮總兵官事權甚輕兼之各處調到



客兵全不遵其約束遇有警急必須呈請軍門相去  
隔遠多致延誤名雖大將實與裨將無異呈乞查處  
案呈到部看得薊鎮總兵官何蒙

聖明特用胡鎮是誠一時之虎將尤為得人但總兵事權  
向來本輕兼之陝西宣大遼保調到官兵其分則迭  
為賓主其情則視同秦越每當虞警總兵雖奮勇直  
前客兵乃遂巡退後十指更彈豈若合拳之一擊所  
據該司欲要亟重總兵事權一節委為根極領要之  
論合候

命下移咨總督都御史劉燾備行總兵官胡鎮以後除本

鎮副叅遊守自有體統外其延綏寧夏固原大同宣  
府遼東保定等處或入衛或應援不分副叅遊守悉  
聽本官節制應擺司者徑自分布督守應出戰者徑  
自隨營督戰敢有以前抗違阻撓行事一面以軍法  
處置一面指名叅奏以憑拿問本部仍將前項事宜  
開送翰林院另撰等勅一道齎付本官欽遵行事  
庶幾將權既重將領自新而我

皇上簡任責成之意始不負矣伏乞

聖裁嘉靖四十二年十二月十二日題奉

聖旨是這各處入衛官軍俱聽總兵節制遇有緊急許徑

自調遣平時照舊規行欽此

覆巡撫遼東都御史王之誥請給陣亡總兵官楊  
照遺母養贍疏

題為陣亡將領母老無依懇乞

天恩俯賜養贍以慰忠魂以勵人心事武選清吏司案呈  
奉本部送兵科抄出巡撫遼東地方兼贊理軍務都  
察院右僉都御史王之誥題奉

聖旨兵部知道欽此抄出送司案呈到部看得巡撫遼東  
都御史王之誥題稱陣亡總兵官楊照既無兄弟又  
鮮子息二母無依乞要月給米數石以資養贍量復

其戶下數丁以供薪水一節為照總兵官楊照盡忠  
報國誠為可憫下無一男上遺二母委應優恤既  
經巡撫都御史王之誥具題前來相應議擬合候  
命下將楊照二母每月各給米三石各量復戶丁三名以  
為供養之資嘉靖四十二年十一月十三日題奉  
聖旨是欽此

條議宣大兵政責成邊臣防虜復讐疏

題為議處宣大兵政以防狡虜事職方清吏司案呈照  
得宣府大同兩鎮逼近臨虜巢侵軼之舉無論冬夏近  
日出邊搗巢共斬虜首一百四十餘級

天威雖彰於外境人事當慎其內防呈乞查處案呈到部  
看得攻其必救固兵家之上策先則制人尤防邊之  
多筭宣大搗巢之功仰仗

皇上玄威遠布幕南一空真足以寒旃裘之膽而舒華夏  
之氣矣但犬羊之性在彼本自貪殘熊羆之臣在我  
亟當振勵所據戰守事宜切於目前者理合開坐上  
請恭候

宸斷嘉靖四十二年十一月十七日題奉

聖旨是欽此

一宣府南山一帶逼近畿甸居庸之北聯墩牆壕近

已修繕完備居庸之南內有鎮邊大牆可以戰守合  
無備行總督鎮巡等官江東等不時差人遠哨但有  
侵軼消息一面將南山先行拒堵務令匹馬不得近  
牆一面速報昌平鎮巡官將居庸黃花鎮二區多方  
擺守關內關外務要叶心宣力共圖萬全

一兵須精選方得實用宣大見在兵馬即觀近日入  
援之數強弱參差以之臨敵無濟急緩合無備行總  
兵官馬芳姜應熊速行副叅遊守等官各將堪戰之  
兵逐一選出聽候總兵合營截殺遺下不堪戰之兵  
方作守城守堡之用

一大將軍等砲昨者叅將郭琬用之古北賊已落膽  
則知火器一事乃禦虜之上計合無備行總督鎮巡  
等官江東等於賊經窄路多方藏伏待時而發一擊  
而中可傷千人十擊而中可傷萬人比之弓矢刀劍  
迥不相同先將設備緣由報部稽考

一時方冬月野無青草虜知難相搶掠未免攻困城  
堡合無備行總督鎮巡等官江東等速將不堪堡寨  
通行歸併可守堡寨多發火器多備磚石仍將步軍  
預先分派停當某城若干某人領之某堡若干某人  
領之但有警急則督發遇大衆攻圍則入而

拒守遇零寇突擾則出而邀擊備而又備以收實效  
一虜果入犯聽宣大總督鎮巡等官江東等飛報前  
鎮總督官哨探古北口一帶無警速發邊兵二枝出  
關追勦助其威聲所謂邊兵者非守黃花居庸鎮邊  
三區之兵乃密雲一帶多餘之兵務要計處周悉在  
外不輕調調必得用在內不輕發發必成功

遵諭謹備兵火疏

題為傳奉

聖諭事職方清吏司案呈奉本部送嘉靖四十二年十一  
月二十四日該內閣傳奉



聖諭昨又風作不似時令還要謹兵火欽此欽遵傳奉到部送司案呈到部臣等看得昨者風作有聲不似時令兵火之謹誠如

聖慮在東則薊鎮遼東在西則大同宣府展肅畿甸均稱重地節蒙 天語叮嚀臣等仰承

宸筭申飭之文至再至三至於陝西四鎮雖相去頗遠安攘之圖同當戒慎除馬上差人通行各該總督鎮巡等官悉心整飭邊務以備不虞仍行五城兵馬司各於京城內外嚴防火患外嘉靖四十二年十一月二十四日題奉

聖旨知道了欽此

開查薊鎮題隸事宜責成總督鎮巡諸臣整飭疏  
題為開查薊鎮題隸事宜以修邊政事職方清吏司案  
呈照得薊鎮一切戰守兵馬事宜節經本部題奉

欽依除事涉項有者難以槩行外即目總督總兵巡撫俱  
係新任之初誠恐文移浩繁一時未諳始末未免停  
閣遲滯呈乞查題案呈到部看得薊鎮戰守兵馬事  
宜雖經本部節次題奉

欽依但總督總兵巡撫俱係新任文移之浩繁未及詳閱  
事情之顛末自難洞徹臣等謹擇其要開坐上請伏

乞

勅下總督都御史劉燾總兵官胡鎮巡撫都御史溫景葵  
逐一作速整飭完日各另回奏嘉靖四十二年十一  
月二十四日題奉

聖旨是這所開并前二次事宜都着劉燾胡鎮溫景葵着  
實速行如別有意見即便奏請不許遲悞欽此

一通州地方密邇京師運道倉庾均屬重計至於張  
家一灣尤為財貨之地雖經設有叅將但近日防秋  
又行調守邊垣以致倉卒遇警旋發京兵事體未便  
且原議募兵一千舊兵二千共足三千名亦當查處

合行劉壽等即查募兵一千曾否告完催行密雲兵  
備道會同叅將選募教練以後防春防秋止在本城  
并張家灣一帶防守不許再調防邊以致兩相耽悞  
本部仍行各該衙門一切雜差通行除免養其銳氣  
一山西入衛民兵三千名先該本部題准免其入衛  
自嘉靖四十一年為始每歲每名量徵工食銀五兩  
共銀一萬五千兩解送薊鎮軍門轉發密雲兵備道  
收貯修造盔甲器械給發各區軍士應用不知四十  
一年四十二年銀曾否解到修過盔甲器械若干支  
過銀兩若干見在若干合行劉壽等作速查明回奏

一曹家寨原議募兵三千名就於曹家寨搭蓋營房  
住劄石門寨募軍一千名就於山海關住劄先該本  
部題准每軍當年給安家銀五兩第二年給銀二兩  
第三年給銀一兩不知前項軍士召募已完未完銀  
兩何項動支事體有無穩便合行劉燾等作速查明  
回奏

一潘家口與喜峰口關外天設灤河之險形勝可據  
先該本部題准增修邊牆五百丈臨河墩臺一座合  
用銀兩於修邊銀內動支其應該設險去處仍聽陸  
續勘議合行劉燾等即查前工曾否修完仍將各區

應該設險處通行會勘明白作速具奏

一宣鎮東路境界至鎮南墩止薊鎮渤海所北界至  
火焰墩止二墩相去中間空地三十里未有管束先  
該本部議於適中之地兩鎮分脩牆垣共為一邊極  
屬喫緊合行劉憲會同宣大總督尚書江東刻期整  
理完固各令具由回奏

一薊鎮總兵下標兵缺少先該本部題准於馬蘭谷  
太平燕河石匣四區通查遠年逃故缺絕二千名設  
法召募以為選鋒每軍初年給安家銀二兩於河南  
山東民兵工食銀兩內支給今總兵新添標兵一枝

係干一事合行劉燾等即查前項軍士二千名向來  
曾否募完如果已完應否就作新添標兵之數徑自  
施行不必回奏

一薊鎮各區西則古北口最為要害東則太平寨最  
為要隘原議以馬蘭谷改叅將却以副總兵職銜加  
于古北口分守節制曹家寨石匣營兩遊擊以燕河  
營改叅將却以副總兵職銜加於太平寨分守使之  
叶同總兵撫賞賁夷不知事體有無相應合行劉燾  
等查議會奏如果事體窒碍亦要明白咨部查考  
一薊鎮補兵練兵事宜先該本部題准行巡按巡閱

御史再加開視即今虜警方寧且總督鎮巡官俱係  
新任正當勸之時相應酌處合洛都察院轉行巡  
按御史董元封巡關御史黃泮查照先今事理稍待  
來春三月以後逐一閱視明白徑自回奏

一薊鎮之兵數踰九萬籍有三等先該本部題准請  
勅兩關御史兼理清軍事務通將各區分守并標遊等兵  
三項各造冊三本其係編發抽梁者將應繼弟男  
不拘隨伍與原衛俱許開報的名各另造於本軍之  
下以後遇缺據籍頂補不必再用清勾其係召募者  
該管官按季開報止給募軍銀二兩仍將邊軍逃故



并解補多宜各責成該管將領并衛所等官年終復命分別功罪以後續差御史查照接管合咨都察院轉行巡關御史黃泮孫丕揚欽遵舉行各令回奏

一古北石塘二區軍士逃故八千餘名若待清勾一時不能告完先該本部題准出給榜文不拘年月久近及本身親屬通許告首仍免問罪審係丁力精壯取具里隣結狀徑自解補收操之日即與食糧老弱不堪者許報第男子姪頂補一體優恤合行劉壽等速行該區叅將各查前項軍士首過若干曾否從實舉行具由回奏

覆太僕寺卿劉畿等條議寄養馬政疏

題為馬匹缺乏懇乞

聖斷早賜區畫以嚴武備事車駕清吏司案呈奉本部送兵科抄出太僕寺卿劉畿等題奉

聖旨這所奏兵部看了來說寄養馬匹倒失既已數多見在不堪兌的又幾及十分之四馬政何以廢弛至此一併查處具奏欽此抄出送司行據太僕寺將計處事宜開款具呈到部送司案呈到部看得太僕寺卿劉畿具題前因大率謂見在寄養馬匹數少欲將收買改派二事併舉要將馬價銀兩備查節年借支別費應

還寺者督催還寺不係買馬者不得一槩准給一節  
為照節年寄養馬匹不下二三十萬見在者任其倒  
失既不稽考倒失者應納價銀又不追徵以真定諸  
府良民之膏血填順河二府奸民之溝壑千瘡百孔  
廢壞至極臣等近日題奉

欽依責差少卿劉朝佐主事郭廷臣親詣各該州縣通行  
整理意蓋有見於此所據該寺原議大率不過改派  
本色發銀買馬二事切緣買馬一事騷擾閭閻無益  
有損惟有改派本色一事原係舊例相應依擬合候  
命下本部速行北直隸山東河南巡撫都御史及咨都察

院轉行北印馬御史將嘉靖四十三年分備用馬匹  
除沂費郊膝嶧五處折價外其餘仍照四十一年以  
前舊例全徵本色解部發寺以備調兌其折色銀兩  
以後容臣等酌量事情重輕應動支者量為動支不  
應動支者自難輕動其各部借過者移文清查不許  
再借以悞軍國大計及照該寺雖將計處馬政事宜  
呈報前來以臣等愚見有治人無治法未有政得其  
人而法不舉者故斷然以少卿之專督印馬御史之  
監覈以為首務合就一併開坐上請恭候

宸斷嘉靖四十二年十一月二十九日題奉

聖旨這馬政事宜你部裏并各官都要着實舉行欽此

一專 勅寄養少卿查得該寺雖有少卿專管寄養

緣 勅書原不坐名挨次輪管有同傳舍且經年全  
未巡蒞以致州縣官民肆無忌憚廢弛之由正坐於  
此合無以後行令該寺少卿一員專管寄養不許相  
沿交代每年巡蒞二次上半年以二月為期四月回  
寺如有瘦損不堪充者聽將管馬官照例決打定限  
下次設法喂養驗騰下半年以八月為期十月回寺  
如馬仍瘦損仍行決打年終類聚每次巡蒞回日備  
造文冊一本送部查考見管少卿劉朝佐換給坐名

勅書一道欽遵行事

一責成印馬御史查得印馬御史近該本部題奉  
欽依兼管備用寄養二事狀寄食止為馬價一節原未及  
於本色合無移咨都察院轉行北印馬御史以後將  
寄養本色馬匹并追徵馬價通行管理每年終將查  
處過事宜造冊一本送部查考應叅應問官員會同  
少卿一體叅問

一督責州縣正官查得綜理稽查全在各州縣掌印  
官先該本寺具題本部覆議掌印官於雙月查驗馬  
匹堪兌不堪兌俱要開註職守已明無容別議止因

該寺雖有薦劾之例向未由寺行以致人心玩愒全未奮勵合無每年終仍聽該寺會同提督少卿并印馬御史將各州縣掌印官及分府管馬通判從公甄別如倒失及不堪數少者指名薦獎本部移咨吏部俸深者照例陞用俸淺者量為加俸倒失及不堪數多者據實叅劾查照舊例以十分為率不及五分以上應住俸者住俸應降級者降級明白開奏以示懲勸一計處倒失追賠查得失馬匹舊例俱問罪追補本色故種馬倒失州縣行追補向無拖欠合無將寄養馬匹斟酌前例自靖四十三年為始領養十

年以下未經借兌倒失者追補合式大馬解寺印烙  
仍發領養姑免問罪領養十年以上馬齒已老倒失  
者追銀一十二兩曾經借兌退回者仍照近例交還  
之日原充官驗係癘瞎損傷錢養不痊曾經入冊者  
臨時與中途倒失止追皮張銀四錢領回三月之內  
倒失加追肉臟銀伍錢領回三月之外倒失追銀五  
兩如驗係臆息少減尚堪錢養不註入冊者查照借  
兌次數借兌一二次倒失者照保定事例追銀十兩  
借兌三次以上倒失者照遼東事例追銀七兩  
一查處變賣馬價查得嘉靖七年奏准差太僕寺少



卿督同府州縣掌印管馬官將寄養馬匹通行查點  
果有不堪兌軍者分別所年分變賣合無自嘉靖  
四十三年為始聽該管少卿徑自分別領養必須十  
年以上者方許變賣仍查面否兌借如兌借一次二  
次者照保定事例追銀十兩兌借三次以上者照遼  
東事例追銀七兩未經兌借者照十年以上倒失事  
例追銀一十二兩其堪養之馬責令用心餵養不許  
一槩變賣以滋奸弊

一查處寄養馬戶查得例有地五十畝者免其納  
糧止養馬一匹以丁糧多者編充馬頭專一養馬餘

令津貼錢鈔以備倒失買補之用不許輪流如有  
前輪流及令孤寡殘疾一槩出辦者發遣衛充軍  
例甚嚴相應申明合無嚴行各州縣掌印官痛革  
冗花分等弊務將糧多者充為馬頭地畝如不足  
數方以中下戶津貼錢鈔不許輪流餽養地賣馬  
存者斷令買地人戶領養至於倒失變賣馬價載  
在勅內遇赦不免今後無故不得輒行奏免違者  
聽本部與該科叅究

覆薊鎮督撫官劉燾等條議善後事宜疏

題為經略薊鎮善後事宜以弭虜患事職方清吏司案

呈奉本部送兵科抄出總督蒞遼保定等處軍務兼理糧餉都察院右副都御史劉壽整飭薊州等處邊備兼巡撫順天等府地方都察院右僉都御史溫景葵題俱奉

聖旨兵部看了來說欽此通抄送司案呈到部看得總督薊遼軍務都御史劉壽等所陳四事皆以臣等原議因而推廣其說無非兵食戰守之計合就開立前件議擬上請定奪嘉靖四十二年十二月初二日題奉聖旨這本內干係錢糧的還會同戶部計處歸一來說其  
餘依擬行欽此

一議處督總標下親兵看得總督鎮巡官等慮俱已周悉合無聽本部將應發馬一萬七千六百二十八匹候調有軍士但穀二三百名即行太僕寺以次充給務足所討之數一面移咨工部將盔甲弓箭腰刀各一萬九百九十七副并改造工價刻期速發一面移咨戶部將募兵銀五萬四千九百八十五兩先於別衙門權為借給月糧行糧料草仍行徑自計處其餘議留民兵銀兩等項事宜悉如所擬施行

一議處入衛邊兵糧賞看得總督鎮巡官謂昔厚今薄與臣等原議相同合咨戶部作速查議其糧料草

東無事本折間支有警本折聽便亦聽該部一併議處至於節制各鎮客兵整飭京營戎政均係根極領要之論本部即行戎政大臣將原議選兵六枝務期人人可用以修實政邊將如不敷行本部另行推舉一議處宣遼境外哨探看得總督鎮巡官俱謂借鄰邊之耳目為薊鎮之聞見誠先機預防之一助事體已明無容再議至於搗巢一節本部節經題奉

欽依近因虜警又行宣大二鎮分投出勦果得虜首一百四十餘顆足為明驗合無通行宣大遼東鎮巡等官以後不分春夏秋冬勢有可乘即便出邊鵬勦首級

照例陞賞赴供牛馬盡數給與原獲之人充賞

一議處朵顏三衛夷種看得總督鎮巡官欲將牆子嶺境外住牧夷人革其撫賞不許仍舊盤據果能悔禍擒獻勾引之人照舊與開撫賞仍奏請陞擢查與臣等分北三苗之義大率相同事在閫外且干係夷情合聽彼中徑目相機施行以上所議者皆今日之急務但畿甸之地非同別鎮不在一擊之功當收萬全之略况倚牆而戰譬之鬪者拒高以凌下其勢自易以臣等愚見仍當戰於沿邊使之必不得入方為上策

覆總督戎政鎮遠侯顧寰等條陳營務疏

題為傳奉

聖諭事職方清吏司茶呈奉本部送兵科抄出該總督京營戎政太子太保鎮遠侯顧寰等題奉

聖旨兵部看了來說欽此欽遵抄出送司案呈到部看得總督京營戎政太子太保鎮遠侯顧寰等奉

旨條陳八事臣等逐一叅詳均非浮泛之論但該營兵馬

在內有城守之責在外有征勦之責必須人人可用方不空費糧餉之需必須字字舉行方能有裨軍

國之政伏望

皇上申飭總協二臣竭精殫力祛去常套務見實效以副簡任責成至意嘉靖四十二年十二月初三日題奉

聖旨是京營係兵戎之本這選練事宜務在實行不許徒只說過有負委任欽此

一精挑選之法看得兵不貴多而貴於精今欲挑選頭等軍士一萬八千名分為六枝選委邊將六員統領事已周悉合無依其所擬聽該營先將邊將姓名坐委具奏如營中官不敷用移文本部另行推舉六將官下家丁准各增十名馬匹候兵果練成處給一核操練之實看得列營放砲不過修舉故事空費



無益空勞無補合無依其所擬聽該營通行各將領  
以後分投督率或以銀牌教演弓矢或立賞格教習  
火砲果有成效本管官咨部推用其往時因襲營規  
一切停罷

一作將士之氣看得在外總兵等官體統本部先已  
具題奉有

欽依所據京營將官事同一體合無申明新例副將參遊  
與京官無相統攝者處以賓禮中途相遇不必隱避  
如違聽本部并該營查察究治

一明補替之例看得召募軍士若使通准替補未免

多費糧餉今議稍加調停以為適中合無依其所擬除召募在逃者照例不隸外其在營病故或為他事因而住糧者俱赴本部告明病故者各以精壯親餘頂補為事者許其出首復役

一禁奸詭之習看得將官果有奸賊叅後方得行提近來不分已未叅奏甚至兵馬司奉有各衙門明文徑自差人守提將氣索然甚乖事體合無以後將官有犯各該衙門會同戎政衙門查究明白方許叅提一專兵車之教看得兵車之製止則為營行則為陣乃自昔兵家所不廢者但須委任得人方克有濟合

無聽該營自選諳練將官一員先於工部量取一營之車召選各處孰知兵車人役用心教習果有成效奏請多備如查無相應將官移文本部另行推舉一預器械之設看得盔甲器械預先整辦委得有備無患之意合無依其所擬備咨工部查處施行一定編派之規看得列營守城官軍預先編派不致臨時倉皇合無依其所擬備行該營編派完日開造文冊二本一留該營一送本部稽考

遵諭葬於陸亡戰士疏

題為傳奉

聖諭事職方清吏司案呈奉本部送據本部武選清吏司  
署員外郎事主事毛綱呈前事到部送司案查先於  
嘉靖四十二年十一月二十四日於

迎和門該文書房王本傳奉

聖旨近日陣亡士卒聞猶暴露原野朕甚憫焉便差屬官  
一員前去督同彼處有司悉行埋掩仍動支官錢總設  
一祭以慰幽魂其孫贖之死猶有知罪畏法之意着與  
卹典三分之一兵部知道欽此欽遵已經劄委本官去  
後今該前因查呈到部看得前項陣亡士卒仰蒙

聖明特垂軫念掩其屍不令暴露以召天地之和祭其魂

使有所歸以作忠勇之氣幽則春及枯骨明則風行  
絕塞臣等待罪本兵躬逢其盛無任欣荷嘉靖四十  
二年十二月初五日題奉

聖旨知道了欽此

會議薊鎮主客兵餉疏

題為經略薊鎮善後事宜以弭虜患事先該兵部題覆  
薊鎮總督鎮巡等官都御史劉燾等條陳事宜節奉  
聖旨這本內干係錢糧的還會同戶部計處歸一來說欽  
此欽遵抄捧到部臣等會同太子少保戶部尚書高  
耀等謹將本內干係錢糧二條逐一面加酌議俱已

歸一合就開立前件議擬上請定奪  
乾隆四十二年

十二月初九日題奉

聖旨這錢糧你每既會議歸一都准行欽此

一議處督總標下親兵查得薊鎮舊例主兵月糧上半年本色本色不敷每石折銀六錢五分下半年折色每石折銀四錢五分有馬軍士每年夏秋自行牧放春冬支給料豆大月九斗小月八斗七升至於調遣按伏有警騎征出百里之外行糧本折間支支本色之日每軍給米一升五合每馬豆三升草一束支折色之日每軍米折銀一分五毫豆折銀一分二厘

草折銀一分七厘嘉靖三十四年該督撫題要將主  
兵調守三四十里及六七十里之外者准令半支該  
戶部議覆調遣五十里以外者係防秋之日果有賊  
勢壓境晝夜擺守准間日半支稍緩即止五十里以  
下不准支給若果與賊對壘相持事勢急迫半支者  
暫准全支不支者暫准半支賊退即止已經題奉

欽依通行欽遵外今該總督劉燾等題稱新募軍一萬九  
百九十七名添馬一萬七千六百二十八匹應發行  
月糧料草合照前例就於年終將新募新添軍馬各  
實在數目查算的確併入會計數內具奏以憑戶部

給發如會計之後續有召募至二三百名聽督撫咨報另行添給其民兵工食見在銀五萬九千四百九十兩一錢照舊存留以備操練製器之用募軍銀五萬四千九百八十五兩兵部借給一半該銀二萬七千四百九十二兩五錢戶部借給一半該銀二萬七千四百九十二兩五錢先行解發一面嚴催河南四十二年以前拖欠民兵工食各照補還山西額解民兵工食銀一萬五千兩并山東河南每名新增三兩聽解軍門為操練犒賞及修理器械支用河南額解四萬二千兩山東額解二萬六千兩仍解戶部轉發



管糧郎中為標兵糧料支用

一議處入衛邊兵糧賞查得薊鎮嘉靖二十九年以後各邊入衛官軍初以往返寒苦告討賞賚事體未定多寡不一至三十八年該戶部議將延綏寧夏等營每官賞銀一兩每軍賞銀五錢宣大遼東等營每官賞銀七錢每軍賞銀四錢節經題奉

欽依遵行至今其行糧料草每軍日支米一升五合每馬日支料三升草一束俱本折間支米折銀一分五毫豆折銀一分二厘草折銀一分七厘原有舊例今督撫劉壽等欲將賞賚加厚及要糧料乾潔無事昭舊

本折間支例警本折聽從軍便無非優厚軍士之意  
相應議處以後各邊入衛官軍巡綏寧固路遠者舊  
規每官一員賞銀一兩今再加二錢共賞銀一兩二  
錢每軍一名賞銀五錢今再加二錢共賞銀七錢宣  
大遼東輪流換班者舊規每官一員賞銀七錢今再  
加二錢共賞銀九錢每軍一名賞銀四錢今再加二  
錢共賞銀六錢其召買糧料草束務要乾潔堪用無  
事之時照舊本折間支果係有警應援與賊對敵本  
折聽從軍便折色仍照例折給不必照依時估致生  
覬望

覆薊州鎮巡官胡鎮等覈勘禦虜軍功陞賞疏

題為傳奉事職方清吏司案呈奉本部送兵科抄出鎮  
守薊州永平山海等處地方總兵官前軍都督府都  
督同知胡鎮題奉

聖旨兵部看擬來說欽此又該整飭薊州等處邊備兼巡  
撫順天等府地方都察院右僉都御史溫景葵巡按  
直隸監察御史董堯封各題同前事俱奉

聖旨兵部知道欽此通抄送司案呈到部看得鎮守薊州  
總兵官都督同知胡鎮巡撫順天等府右僉都御史  
溫景葵巡按直隸監察御史董堯封各具題前事大

率言會同查勘過薊鎮獲功緣由為照薊鎮牆子嶺之警明係邊臣失守所致于時彼虜猖獗我兵觀望遠近警惶罔知攸止仰賴

聖皇在上神謀淵筭誠感玄穹既將總兵官胡鎮頒賜銀兩襲衣又將本官特陞都督同知犒賞之使四出項背相望芻粟之旨屢下綸綍交孚覆載之德乾元坤厚合兩儀而同功勸懲之典雨露雷霆實並行而不悖以故敢死之士前呼後奮捐生之將西勒東擊計自孤山以至古北總兵胡鎮等與總督江東始終不下一二十戰蠢茲醜虜可謂狼狽而歸矣內外大小

臣工獲覩玄庥同切仰感所據一時諸臣固不敢貪天之功事干激勸亦當甄叙除總督尚書江東先已陞蔭原任叅將李康民近復其叅將管理薊鎮巡撫標兵總兵官孫贖已蒙

特恩贈都督僉事蔭一子做百戶外其餘有功人員既該鎮巡官胡鎮溫景葵巡按御史董堯封勘報前來中間品第俱已停妥但當陣血戰出邊追勦二項之功極為難得至於途勦零散之功為力頗易自難槩論相應通行議擬合候

命下將總兵官胡鎮古北口叅將郭琥超格陞賞入衛遊

擊楊紹石王李世倫加陞賞叅將等官王孟夏李  
裕信等三十五員各加陞級原任通州知州今陞兵  
備僉事張守中見任平谷縣知縣任彬量陞俸級內  
王孟夏李裕信張守中任彬仍與副總兵等官袁正  
等三員優加賞資原任總兵叅將等官王繼祖李輔  
徐致中徐枝或行提木結或原係死罪或見在充軍  
事體輕重不同仍行巡按御史各查所犯情罪明白  
速議定奪陣亡入衛遊擊趙漆比照遊擊張紘事例  
贈都督同知另陞一子為正千戶世襲仍立祠死所  
歲時致祭陣亡官文雄等十六員各陞三級陣亡胡

鎮下親丁張鎮等三十六名并旗軍各陞二級其在陣并出邊斬首一顆願陞者照新例陞二級內係酋首者陞三級願賞者給銀五十兩途勦首級一顆願陞者照舊例陞一級願賞者給銀三十兩願贖者查議准贖嘉靖四十二年十二月十一日題奉

聖旨這功次你每既分別明白胡鎮郭琥各陞三級楊縉等各二級王孟夏等各一級王孟夏李裕信還各賞銀十五兩張守中任彬各陞俸一級與袁正等各賞銀十兩王繼祖等巡按御史查議具奏其餘依擬欽此

遵諭急整邊備疏

題為傳奉

聖訓事職方清吏司案呈奉本部送嘉靖四十二年十二月二十三日該 內閣傳奉

聖諭鎮報當急整備才好欽此傳奉到部隨該總督薊遼保定等處軍務兼理糧餉都察院右副都御史劉燾揭為預飭薊鎮春防事等因到部送司案查先該本部看得東西二虜住牧宣大遼東境外雖當春淺草枯之時屢肆鼠竊狗偷之計况來歲閏有二月轉盼之間正月即至戰守之策委當早為申飭合候

命下本部一面移文總督薊遼都御史劉燾薊鎮總兵官



胡鎮昌平總兵官劉漢巡撫都御史溫景葵督同副  
叅遊守兵備等官要見防春兵馬主兵應該作何分  
派擺守邊兵應該作何分派策應何區極衝兵當加  
厚何區次衝兵當稍厚口裏口外火器應該作何安  
置文書到日限半月以裏開坐回奏一面移文總督  
宣大尚書江東宣府總兵官馬芳巡撫都御史楊巍  
大同總兵官姜應熊巡撫都御史張邦彥遼東總兵  
官佟登巡撫都御史王之誥督同副叅遊守兵備等  
官選差乖覺家丁夜不收分投於三間房白草川大  
青山板升及東虜佳牧地方多方哨探但有聚兵消

息即便飛報薊鎮仍自本年十二月十五日以後每  
十日境外哨探有無賊跡緣由依限奏報其宣大入  
衛官兵雖經放回休息原議正月抵關住劄并行江  
東等加意整棚聽候劉燾徑自調遣上自總督鎮巡  
下及副叅遊守世受

國恩均有安攘之責務要據忠戮力仰慰

聖皇宵旰之懷如敢自分彼此致誤事機聽臣等與該科  
指名叅奏處置其宣大遼保山西新選應撥兵馬亦  
要一體整棚以為先事之備等因已經題奉

欽依通行去後今該前因查呈到部看得東西二虜在春

則於二月三月窺伺薊鎮亦有正月突至如往歲黑  
峪關之事者在秋則於八月九月窺伺薊鎮亦有十  
月突至如今歲牆子嶺之事者非時入寇揀我不備  
此乃犬羊狡詐之常臣等先亦熟慮及此已經題奉  
欽依嚴行總督都御史劉燾總兵官胡鎮巡撫都御史溫  
景葵將防春事宜作速會奏茲蒙

聖明因鎮之報勅下臣等當急整備神謀淵算臣等恭摺  
無任感激所據總督劉燾等開列兵馬似已周悉但  
標兵選募一時不能遽齊合無於臣等題准宣大山  
西援兵內宣府正奇遊兵五枝共該一萬五千名大

同正遊兵四枝共該一萬二千名山西正遊兵三枝  
共該九千名速行江東一面整棚停當一面差人遠  
哨但有醜虜東過白草川三間房消息不必候調即  
便統率入關分道策應本部仍行保定鎮巡官尹秉  
衡魏尚純遼東鎮巡官佟登王之誥各將本鎮應援  
兵馬整棚停當作速奏報以憑另行調遣其宣大兵  
馬先儘南山保定兵馬先儘馬水口必須二處絕無  
警報薊鎮的有警報方可啓行既不宜觀望坐失薊  
鎮之事機亦不宜輕率以悞本鎮之事務至於劉壽  
等所稱邊牆以內設立窩鋪官廳邊牆以外設立壕

暫遇石斬崖遇土掘坑不分主客官兵各照依信地  
及時修理尤為得策合悉如擬施行伏望

皇上申飭文武大小諸臣務要同心戮力共弭虜患如敢  
自分彼此偏徇牽制恣肆怠緩悉聽巡按巡關御史  
叅奏拏問重加究治以為不忠者之戒嘉靖四十二  
年十二月二十三日題奉

聖旨是春防伊邇這事宜各該總督鎮巡等官作速力行  
保固邊圉如敢推調玩弛重治不饒欽此

會議總督戎政鎮遠侯顧寰簡用以責後效疏  
題為閩帥寺卿不堪要任懇乞

聖斷亟賜罷黜以勵人心以敦實治事先該兵部題該刑  
科左給事中王楷叅稱總督京營戎政太子太保鎮  
遠侯顧寰不職乞要罷黜一節為照京營戎政廢弛  
固已有年緩急不足為恃該科歸咎總督之臣殊非  
過論但惟鎮遠侯顧寰歷官中外久稱廉謹即今該  
營兵士樂其不擾似亦相安若能加振勵之功自當  
著明作之效况今春防在近一切戰守事宜奉有  
欽依方在整飭應否去留出自朝廷臣等未敢定擬及  
照推舉將官一事臣等惟恐不明不公有負

皇上委任雖嘗於廷議之時再三咨問未盡廣集衆思之

意合無以後有缺先期開報應會官員各舉所知具揭送部聽臣等酌議停當然後照例會推奉

聖旨是京營重務總督須得其人顧寰應否留用及中外有堪是任的你部裏還會多官慎評公舉來說欽此欽遵抄出到部臣等會同後軍都督府掌府事太師兼太子太師成國公臣朱希忠等吏部尚書兼翰林院學士臣嚴訥等議得總督京營戎政太子太保鎮遠侯顧寰敦大頗得軍心廉靖久孚士論貴以衝鋒破敵委非所長使之居重馭輕尚在可用一時勲臣似無出其右者伏望

皇上特加戒諭令其策勵供職以修戎政以報

國恩惟復別蒙

聖裁及照右府所舉英國公張溶定國公徐延德見在掌管印信難以輕動平江伯陳王謨賊私狼籍方在革任通政使司所舉誠意伯劉世延少年負氣仍當歷練俱難別議至於六科十三道官所舉保定總兵官尹秉衡古北口副總兵郭琥原任遊擊將軍盧國讓及臣本部所舉西寧侯宋天馴原任大同總兵官今謫戍韓承慶雖才器大小不同均在可用合無將尹秉衡等五員遇有營中相應員缺酌量推用內謫戍



者照依總兵吳瑛事例充為事官有功之日方准復職庶幾裨將之用漸可得人大將之選自當不乏矣  
嘉靖四十二年十二月二十四日題奉

聖旨是顧寰既僉謂尚在可用着照舊策勵供職尹秉衡等依擬欽此

覆順天巡按御史董堯封條陳薊鎮邊務疏

題為陳言邊務以懲夙弊以飭武備事職方清吏司案呈奉本部送兵科抄出巡按直隸監察御史董堯封題奉

聖旨兵部看了來欽此欽遵抄出送司案呈到部

巡按直隸監察御史董堯封條陳六事均於薊鎮邊  
務有益合就開立前件議擬上請定奪嘉靖四十二  
年十二月二十六日題奉

聖旨准議行內撫軍士事宜還着劉燾等條具奏請欽此  
一曰懲往事以杜欺玩大率謂有哨報之欺玩有守  
堵之欺玩有追賊之欺玩有虜退之欺玩欲要總督  
鎮巡官痛加釐革蓋因本官巡蒞地方得之目擊以  
故言之親切往者既不可追來者悉當為戒合無依  
其所擬備行總督劉燾督同鎮巡等官將前項四端  
欺玩痛加懲革以後如敢仍前恣肆應以軍法處治

者徑以軍法處治應叅罕者指名叅罕

二曰申法令以飭將領大率言勦鎮法令不明將領玩縱欲要嚴行總督鎮巡衙門備查所屬將領果能補練兵馬撫恤軍士則優處之即有不及姑示寬假若慢事剋軍無益補練斷之以法反覆開陳深中肯綮合無依其所擬備行總督劉燾督同鎮巡等官悉照所議從實舉行果有仍前故肆有悞邊防者據實叅罕不得姑息因循致悞大計

三曰撫軍士以來召募大率言近日召募久無一至蓋由將官平日撫禦失宜所致欲要總督鎮巡衙門

嚴禁將官勿擅私役勿減衣糧為召來材勇之地深切時弊合無依其所擬備行總督劉燾督同鎮巡等官嚴禁各該將領不許私自擅役軍丁致妨操練衣糧等項不許虧減務令得所如有仍蹈前弊者悉聽督撫巡按官指名叅治

四曰禁暴掠以安居民大率言官軍多習故態暴掠多端欲要嚴行禁諭以安地方不能禦寇反以為寇深可痛惡合無依其所擬備行總督劉燾嚴行各該將官今後不問本鎮及應援官軍所過州縣如有仍前暴掠者徑以軍法處治若有將官知而故縱一體

坐罪

五日習營壘以保士卒大率言近來諸將號令不齊以致戰陣失利欲要乘補練之時嚴加訓習以保萬全是誠兵家之上策合無依其所擬備行總督劉燾督同鎮巡官嚴行各該將領乘今補練各將戰陣機宜并一切應敵長技訓習精熟務使臂指相應戰守均利以收實效

六曰預應援以固內地大率欲要將近邊內地預計虜賊必窺處所分投設伏相機戰守無非保全地方之至計合無依其所擬備行總督鎮巡官嚴行各該

將領提調等官通將分管地方每於防秋之時預先相度衝緩并令兵強弱某處應該設伏某處應該設疑仍量主客將領之材略州縣之大小因才授責一處分停當遇警相機分勦事寧之後一體覈實分別功罪以示賞罰

覆薊遼總督都御史劉燾申嚴軍令疏

題為申軍令以固戰守事職方清吏司案呈奉本部送兵科抄出總督薊遼保定等處軍務兼理糧餉都察院右副都御史劉燾題奉

聖旨兵部看了來說欽此欽遵抄出送司案呈到部看得

總督薊遼軍務右副都御史劉燾具題前因大率言  
薊鎮將兵號令未申人心不齊教練之時營哨隊伍  
之制不定對壘之際分合進止之令不明欲要詳議  
註為定例通行遵守一節為照邊方之事固在於地  
利尤貴於人和輯人心賞罰號令均當明信若使  
號令不明人心不齊用之以守雖重關疊嶂不過險  
易之常用之以戰雖帶甲連營何益勝負之數況薊  
昌二鎮適當虜警之餘群策未協群力未一振勵之  
方預見早圖尤不容緩所據總督劉燾議題前因委  
為軍中第一要務相應通行依擬合候

命下移咨總督劉燾督同鎮巡官胡鎮溫景葵通行各該將領等官查照所議分定營哨隊伍平時加意訓練遇敵各照議定軍令戮力戰守如戰全勝查係某哨隊當先將首功之人定行上賞萬一不勝查係某哨隊先退之人定行重罰如損失一將領罪坐於該營哨官如損折一哨官罪坐於該哨隊長如損折一隊長罪坐於該隊衆軍俱要查為首先退者申以軍法處治至於十路分布防禦不論主兵客兵各照信地協力拒守如有疎虞亦照營哨隊伍一體重究將領臨陣退縮及調遣後期或行伍不整軍數不實者悉



聽總督鎮巡官叅劾治以重典有能效忠宣力出奇  
致勝者亦聽總督鎮巡官特本薦獎以示激勸總督  
軍門先行出給簡明告示諭衆知之曉諭之後如敢  
危言鼓壞人心使氣抗違軍令或稱病求歸或怠玩  
不理副叅以下先行指名叅究以憑鞫問嘉靖四十  
二年十二月二十七日題奉

聖旨是欽此

楊襄毅公本兵疏議卷十二終